

四庫全書

經部

欽定四庫全書

經部

欽定周官義疏卷八

詳校官監察御史<sub>臣</sub>施朝翰

刑部郎中<sub>臣</sub>許兆椿覆勘

覆校官監丞<sub>臣</sub>侍

朝

校對官主事<sub>臣</sub>張

培

騰錄監生<sub>臣</sub>金

垣

欽定四庫全書

欽定周官義疏卷七

天官冢宰第一之七

內宰掌書版圖之法以治王內之政令

正義鄭氏康成曰版謂宮中閣寺之屬及其子弟錄

籍也

賈疏并宮中宦之子弟皆屬內宰書之於版案注但言閣寺而已疏特言無諸官以補足之

圖王及后世子之宮中吏官府之形象也政令謂施

閣寺者

賈疏內小臣及內豎亦施之

劉氏彝曰宮內百職之名

氏皆載於版宮寢內外之廬舍皆畫於圖 易氏祓

曰王內乃王之北宮

辨正黃氏度曰下文均稍食分人民皆為政令政令  
不獨施於閤寺注疏說猶未備

案在版之奄奚其執事有常在圖之宮寢其居處有  
列所謂版圖之法也王之後宮非外臣所得入也故  
必繪其圖然後可以分人民之所居小宰曰王宮則  
已兼后宮內宰則端治后宮與三夫人以下之六宮

凡宮正宮伯所掌者王宮之羣吏士庶子或布周廬  
或次宮內不與嬪婦相接者也內宰所治奄奚之屬  
與嬪婦時接者也小宰兼掌之故統之曰王宮內宰  
分掌之故別之曰王內

均其稍食分其人民以居之

稍所  
孝反

正義王氏昭禹曰人其貴者民其賤者 毛氏應龍  
曰人民者閭寺奄奚工賈府史胥徒之類 鄭氏康  
成曰人民吏子弟

案人民則女酒女漿奚之屬凡稱女宮者亦存焉

通論鄭氏鍔曰宮正宮伯所均所授者王之宮此所均所分者王之北宮也

存疑王氏應電曰后宮外不可直接宿衛周廬故列女宮於旁分部其居而後總以周垣閤寺守之其外乃為官府次舍

以陰禮教六宮

正義鄭氏衆曰陰禮婦人之禮六宮後五前一鄭

氏康成曰六宮謂后也不敢斥言謂之六宮若今皇

后為中宮矣婦人稱寢曰宮宮隱蔽之義

鄭氏鍔曰不曰寢而

曰宮者寢之義為燕息非婦人所宜言

后象王立六宮而居之亦正寢

一燕寢五

賈疏天子有六寢宮人所掌者是也后象王立六宮亦前一後五在王六寢之後為

之南北相當

鄭氏鍔曰后正宮一以聽內治燕宮五以

宴息

以陰禮教九嬪

正義鄭氏康成曰不言教夫人世婦者舉中省文

劉氏曰九嬪之下二十七世婦屬焉陰禮與后同而別教之者兼有事王后及夫人之禮也

案三夫人分掌六宮曰教六宮則后夫人兼之矣二十七世婦分屬九嬪曰教九嬪則世婦視此矣於教后稱六宮尊后也於教九嬪復舉陰禮示不敢儕於后也內官不列三夫人而漿人掌夫人致飲於賓客之禮則知次於后而居九嬪之上者有夫人矣猶師氏保氏不言教太子而諸子職國有大事帥國子而



致於太子惟所用之則知師氏保氏所教國子乃與太子共學者而太子亦在其中

以婦職之灋教九御使各有屬以作二事

注故書二為三杜子春云

當為二

正義鄭氏康成曰婦職謂織紵組紃縫線之事九御女御也九九而御於王因以號焉使之九九為屬同時御又同事也杜氏子春曰二事絲枲之事王氏安石曰婦職之灋所以事王及后共祭祀賓客之

職灋 王氏昭禹曰使各有屬屬於九嬪也位尊則  
宜以德率人九嬪而上教以婦禮所以成其德也位  
卑則宜以事事人九御之屬教以婦職所以作其事  
也太宰以絲枲之職任嬪婦內宰以絲枲之事作九  
御蓋九御勤於絲之事則天下無不蠶者矣勤於枲  
之事則天下無不績者矣 黃氏度曰九嬪掌婦學  
之法以教九御婦德婦言婦容婦功婦功即婦職作  
二事者也此特言二事著女御之職也世婦以上無

絲泉功事

正其服禁其奇衰展其功緒

衰似嗟反本亦作邪

正義鄭氏康成曰正其服止踰侈奇衰若今媚道疏賈

正其服者女御祿衣是正不得踰侈服展衣以上也媚道謂道妖衰巫蠱以自衒媚漢書孝文時婦人蠱惑媚道更相呪詛作木偶人埋之展猶錄也緒業也於地漢法宮禁有云敢行媚道者

王氏昭禹曰展省之也省其絲泉之功緒也

案內宰所掌無刑者王之嬪御惟宜教以禮作其事

可罰可黜而不可刑

嬪婦有過失小則苛罰大則黜遠佐后以治之者則女史及春

官世婦女史職所謂內政  
宮卿職所謂苛罰是也

小宰宮刑之建則以正奄

寺女奚及司厲所入女奴所居之人民耳

大祭祀后裸獻則贊瑤爵亦如之

正義鄭氏康成曰謂祭宗廟

賈疏天地山川社稷等外神后夫人不與故知

大祭祀據宗廟而言王裸后從裸祭統君執圭瓚裸尸大宗執

璋瓚亞裸大宗亞裸謂夫人不與而攝耳瑤爵后爵

以瑤為飾

賈疏四時與禘祫六享皆有裸獻瑤爵之事

存疑鄭氏康成曰獻謂王薦腥薦熟后亦從後獻也

尸卒食王既醑尸后亞獻以瑤爵

賈疏薦腥薦熟是堂上朝踐饋獻之

節室中二裸訖王出迎牲時祝延尸於戶外之西南面后薦八豆八簋王牽牲入以血毛告訖以薦腥於神前王以玉爵酌醴齊以獻尸后亦以玉爵酌醴齊以獻尸朝踐訖乃以熟薦王以玉爵酌盞齊以獻尸后亦以玉爵酌盞齊以獻尸名為饋獻尸食後王以玉爵酌朝踐之禮齊以醑尸謂之朝獻后亦以瑤爵酌饋獻之盞齊以醑尸謂之再獻

案獻之屬莫重於裸故裸獻連言之非裸與獻為二

也后亞裸用璋瓚朝踐至醑尸則用瑤爵所以別於

王之玉爵也賓獻者其散爵與注疏之說以下經賓

客之裸獻瑤爵推之而見其不然 祭統君以玉爵  
獻卿以瑤爵獻大夫以散爵獻士不同者此言正祭  
彼言繹祭禮尚相變故也不可以彼例此

正后之服位而詔其禮樂之儀

正義鄭氏康成曰位謂房中戸内及阼所立處

賈疏特牲

禮尸酢主婦主婦適房中南面祭酒及主人致爵於  
主婦亦於房中南面拜受爵少牢禮主婦入戸西面  
獻尸及賓尸主婦獻尸於主人席北拜送爵主人席  
北即當阼階故云阼所立處此皆約士大夫祭祀之  
禮而薦徹之禮當與樂相應  
賈疏清廟及徹歌雍是薦徹  
言也

皆有樂節九嬪職贊后  
薦徹豆籩是后薦徹也

通論賈氏公彥曰服若內司服褱衣已下六服正之  
使服當其用 王氏昭禹曰禮器曰禮交動於上樂  
交應於下詔其儀告后以出入進止之節使與禮樂  
相應也

### 贊九嬪之禮事

正義鄭氏康成曰助九嬪贊后之事九嬪贊后薦玉  
盥薦徹豆籩

凡賓客之裸獻瑤爵皆贊

正義鄭氏康成曰謂王同姓及二王之後來朝覲為

賓客者

賈疏二王之後稱公王同姓為侯伯得與上公同再裸為子男則與異姓同一裸無后裸

也大行人職上公之禮再裸而酢侯伯一裸而裸之酢子男一裸不酢是上公王先一裸次后再裸

禮亞王而禮賓

案此謂諸侯來朝而王饗之之禮王饗賓則后有裸獻及瑤爵之禮而內宰贊之也大行人職所云再裸而酢一裸而酢一裸不酢者乃朝享後王以鬱鬯禮



之之禮與聘禮聘享後主國君以醴醴賓同非謂饗也后之禮太宗伯攝之賈氏特借彼以說此耳

存異鄭氏康成曰獻謂王饗燕亞王獻賓也瑤爵所以亞王酬賓也 賈氏公彥曰饗禮在廟亨大牢以飲賓立而行禮獻依命數爵盈而不飲燕禮牲狗一獻四舉旅降脫屨升坐以醉為度饗燕后皆助王獻賓酬賓內宰皆贊后也

案燕禮在寢后不與饗禮在廟后亦無酬賓之理卿

大夫傭尸主婦尚不酬賓曾王朝賓客之禮而后酬賓乎既無酬則瑤爵當用以獻而裸獻之不分為二決矣酬則用解亦未聞其以瑤爵也

致后之賓客之禮

正義鄭氏康成曰謂諸侯來朝覲及女賓客

賈疏女賓謂畿

內同姓諸侯夫人有會見王后之法故亦致禮焉

賈氏公彥曰謂若酒正

職共后之致飲于賓客之禮

凡喪事佐后使治外內命婦正其服位

正義鄭氏康成曰內命婦謂九嬪世婦女御

賈疏不言夫人

者夫人從后不在治限

鄭司農云外命婦卿大夫之妻某謂士

妻亦為命婦

賈疏周之禮上士三命中士再命下士一命明士妻亦為命婦

賈氏

公彥曰言凡則王后世子以下皆是服位服之精麤位之前後

案使治以下即佐后之事使蓋使內小臣為之內小臣掌王后之命正其服位則以后命正諸命婦之服位於事為便也康成謂使其屬之上士未必然喪服

傳云夫尊於朝妻貴於室矣言夫妻一體貴賤同之  
命其夫則婦已在其中也故曰婦人無爵從夫之爵  
先鄭謂王命其夫后命其婦未必然記曰夫人之不  
命於天子自魯昭公始也然則夫人之爵命蓋從夫  
而統於天子矣

凡建國佐后立市設其次置其叙正其肆陳其貨賄出

其度量淳制祭之以陰禮

淳劉諸允  
反徐音純

正義鄭氏康成曰市朝者君所以建國也建國必面

朝後市王立朝而后立市陰陽相成之義陳猶處也  
度丈尺也量豆區之屬故書淳為敦杜子春讀敦為

純謂幅廣也制謂匹長某謂純制天子巡狩禮所云

制幣丈八尺純四咫與

賈疏趙商問天子巡狩禮制幣丈八尺純四咫答云制丈

八尺咫八寸四咫三尺二寸又太廣四當為三三八二十四二尺四寸幅廣也古三四積畫是以三誤為

四陰禮婦人之祭禮

賈氏公彥曰王者建國有易

世而遷者自湯至盤庚五遷太王遷岐文王遷豐武  
王遷鎬成王營洛皆是故云凡以該之也 劉氏彝

曰朝以聽天下之政故君立之天道也市以聚四方之貨故后立之地道也 柯氏尚遷曰此不過建國之初后掌其禮既立市則后便不得與其事故司市夫人過市則有罰也 王氏安石曰次其官之次司市所謂思次介次是也叙其地之叙司市所謂各于其地之叙是也肆謂陳物之肆肆長所謂各掌其肆之政令是也

中春詔后帥外內命婦始蠶于北郊以為祭服

中音仲

正義鄭氏康成曰蠶于北郊婦人以純陰為尊

賈疏祭統

天子親耕於南郊以純陽為尊則后蠶於北郊以純陰為尊也郊必有公桑蠶室焉

通論李氏覲曰王后之尊而親蠶則天下女子莫不執懿筐矣王后之尊而獻種則天下女子莫不饁南畝矣王后之尊而勤禮職則天下女子莫不執婦道矣賈氏公彥曰月令三月后妃親東鄉躬桑此云仲春始蠶者蓋謂浴種至三月又浴種乃生之故設文異也

歲終則會內人之稍食稽其功事

正義鄭氏康成曰內人主謂九御

賈疏典婦職授嬪婦及內人女功之

事齋內人是九御也

王氏安石曰內人既均其稍食歲終則

會之既展其功緒歲終則稽之王氏昭禹曰展言

緒則所展者功之倫緒稽言事則所稽者功之成事

佐后而受獻功者比其小大與其麤良而賞罰之

正義鄭氏康成曰獻功者九御之屬

賈疏上文以婦職之法教九御

則所受獻功者還是九御之屬

典婦功職及秋獻功

賈氏公彥曰



功謂絲枲之功

案大小以所成之物言如布帛錦繡則功事之大者  
組帶紛帨則功事之小者小大之中各有麤良賞  
罰蓋於稍食中上下之

會內宮之財用

正義鄭氏康成曰計夫人以下所用財

賈疏總六宮之內所有財

用皆會計之故云計夫人以下所用財也

案膳夫庖人內饔職所共獨王及后世子之食飲膳

羞則夫人以下當別有共之者故內宰會其財用盖必如此然後事不冗而人皆得其節適也用此知古者夫人嬪婦女御爵命雖視公卿大夫士然有財用而別無祿秩盖深居宮禁隨身調度及母家嫺戚問遺禮幣凡用財之事皆包於九式之匪頒好用中內府共王之好賜予外邦之小用此古聖王所以謹內治明內教而為萬民所則效也

正歲均其稍食施其功事

正義鄭氏康成曰均猶調度也施猶賦也 王氏安石曰稍食歲終既會之矣正歲又均焉功事歲終既稽之矣正歲又施焉

案上經會內人之稍食計所以給也正歲又均其稍食何也功事有劇易精粗所獻有良苦則稍食必有損有益而後得其平非歲歲而均之不可

憲禁令于王之北宮而糾其守

正義鄭氏康成曰北宮后之六宮謂之北宮者繫於

王言之明用王之禁令令之

賈疏王有六寢后有六宮各自不同婦人必從

陽后雖自有六宮必資王之禁令故繫王而言也

守宿衛者

賈疏若宮伯所掌士庶子

賈氏公彥曰言北宮者對王六寢在南 王氏昭禹

曰言內宮則知王宮為外言北宮則知王宮在南

上春詔王后帥六宮之人而生種禋之種而獻之于王

種直龍反本或作重音同禋音六本又作糝

正義賈氏公彥曰上春亦謂正歲建寅之月以春事

將興故云上春 鄭氏康成曰六宮之人夫人以下

分居后之六宮者古者使后宫藏種以其有傳類蕃  
孳之祥必生而獻之示能育之使不傷敗且以助王  
耕事共禘郊也鄭司農云先種後孰謂之種後種先  
孰謂之種王當以耕種於藉某謂詩黍稷種種是也  
賈疏先鄭直云先種後種不見  
穀名後鄭意黍稷皆有種種

通論鄭氏鍔曰經於種種之種凡三言之司稼辨之  
而縣於邑閭俾農畛以為式也舍人縣之內宰詔生  
之共王后之獻也

存疑鄭氏康成曰夫人以下分居后之六宮者每宮  
九嬪一人世婦三人女御九人其餘九嬪三人世婦  
九人女御二十七人從后惟其所燕息焉從后者五  
日而沐浴其次又上十五日而徧夫人如三公從容  
論婦禮

內小臣掌王后之命正其服位

正義鄭氏康成曰命謂使令所為或言王后或言后  
通耳鄭氏鍔曰內宰正后之服位大祭祀時也內

小臣則凡后在宮時皆正之

通論賈氏公彥曰大僕掌王命及服位此小臣侍后與大僕侍王同也

后出入則前驅

正義鄭氏康成曰導之

案史浩以前驅為前訶肅衆是以前驅為蹕非也內豎職王后之喪遷于宮中則前蹕則生時出入亦內豎蹕矣蓋小臣近導故曰前驅而內豎之蹕稍遠也

通論王氏詳說曰內小臣職掌王后之命正其服位  
后出入則前驅大僕職掌正王之服位出入王之大  
命王出入則自左馭而前驅是內小臣之職與大僕  
同內豎職掌內外之通令凡小事夏官小臣職掌王  
之小命詔相王之小法儀是內豎之職與小臣同后  
言命而不言大命者后雖有好令於卿大夫無所謂  
大命也

若有祭祀賓客喪紀則擯



正義鄭氏康成曰擯為后傳辭有所求為

詔后之禮事相九嬪之禮事正內人之禮事

正義鄭氏康成曰詔相正者異尊卑也

賈疏詔相正皆擯也后尊

故云詔詔告之而已九嬪稍卑則言相相助之女御卑則正之也

王氏應電曰詔

者先事而告相者助其不及正者糾其違慢 賈氏

公彥曰上三者后皆有事九嬪以下從后往

案內宰以陰禮教六宮故詔后禮樂之儀謂動作威儀整之於躬者宮卿世婦詔王后之禮事裸獻薦徹

肅將其事者內小臣所詔則禮事之小者如女賓客  
見后於宮中喪紀接外命婦內外宗祭祀行於宮中  
廟中在車之儀登下之節皆是也知然者祭祀賓客  
王后泣事於廟惟內宰宮卿得贊而內小臣不得與  
宮中喪紀則內宰不得贊而宮卿世婦比內外命婦  
哭不敬者而苛罰之亦無暇詔后以禮事故專屬於  
內小臣也

徹后之俎

正義鄭氏康成曰俎謂后受尸酢爵飲於房中所設

之俎

賈疏案特牲主人受尸酢乃設俎主婦亞獻尸酢主婦受爵適房中亦有俎天子祭禮亡后

之俎內小臣徹之注亦約士禮而言案特牲設俎在致爵時注疏亦大概言在尸酢後耳

后有好事于四方則使往有好令于卿大夫則亦如之

好黑

與反

正義鄭氏康成曰后於其親族所善者使往問遺之

賈疏謂於王有親若魯衛晉鄭之等

賈氏公彥曰四方諸侯言事卿

大夫言令者后雖無正令施與卿大夫時有言教至

焉於畿外全無言教故以事言之 易氏祓曰好事以物問遺好令以言問勞也

掌王之陰事陰令

正義鄭氏康成曰陰事羣妃御見之事若今掖庭令晝漏不盡八刻日錄所記推當御見者陰令主所求

為於北宮

賈疏求為若縫人女御為王裁縫衣裳及絲枲織紵之類

案必典章素諳而後能正王后之服位必儀文備悉而後能詔六宮之禮事必言語謹信而後可通好事

好令必性行端慤而後可掌陰事陰令故羣奄中惟  
內小臣四人為上士 古者天子日視朝公卿大夫  
士朝夕得進見言事內小臣羣奄之長所掌者不過  
陰事陰令耳東漢末造天子不時見公卿大夫宦者  
口銜天憲勢傾朝野沿至於唐則天子之廢立由之  
死生聽之然後知周公之典百世不可易也

閤人掌守王宮之中門之禁

正義鄭氏康成曰中門於外內為中若今宮闕門鄭

司農云王有五門外曰臯門二曰雉門三曰庫門四

曰應門五曰路門路門一曰畢門某謂雉門三門也

賈疏雉門外有臯庫內有應路故云三門於外內為中春秋傳雉門災及兩觀

賈疏定二年公羊傳鄭氏鶚曰王之五門皆有禁特使閤人

守中門之禁者以朝士職考之外朝在庫門外羣吏

衆庶罷民窮民皆得而入若雉門之內則應門路

門非臣民可得而妄入故於此有禁

辨正賈氏公彥曰先鄭以雉門為二門後鄭不從以

為中門者諸侯惟臯應路三門若魯三門則有庫雉路故明堂位謂魯制二無四庫門天子臯門雉門天子應門蓋天子庫門外更有臯門雉門內更有應門則庫門在雉門外明矣

案郝氏敬以序官每門四人破鄭注王氏應電又謂此專言北宮之中門皆非也雉門以內尚有二門故曰每門四人又以明臯門庫門之守不以奄寺也

喪服凶器不入宮潛服賊器不入宮奇服怪民不入宮

正義鄭氏康成曰喪服衰經也

賈疏曲禮苞屨扱衽厭冠不入公門檀弓

士唯公門脫齊衰

凶器明器也潛服若衷甲者

賈疏襄二十七年左傳將

盟于宋西門之外楚人衷甲是也

賊器盜賊之任器兵物皆有刻識

賈疏如定十年侯犯以郤叛馬赤曰叔孫氏之甲有物是也

奇服衣非常春秋傳

尨奇無常

賈疏閔二年左傳文

怪民狂易

案後漢書陳忠傳注狂易謂狂而性易也

凡內人公器賓客無帥則幾其出入

帥所率反舊色類反

正義鄭氏衆曰公器將持公家器出入者幾謂無將

帥引之者則苛其出入

案此內人蓋女奚之屬



案內人注謂女御女御非以禮事從世婦不輕出也  
若女御出入而閤人幾之恐無此體云內人公器賓  
客者謂內人之公器若賓客也幾之者防假冒也然  
則自女御以上凡公器賓客視此矣止言內人不敢  
斥尊者也注云苛猶呵也非苛刻之苛釋文云本又  
作呵

以時啟閉

正義鄭氏康成曰時漏盡

賈疏謂若夏至晝則日見  
之漏六十刻夜四十刻冬

至晝則日見漏四  
十刻夜六十刻

王氏應電曰晨昏啟閉以時

凡外內命夫命婦出入則為之闢

為于偽反闢本  
又作辟婢並反

正義鄭氏康成曰辟行人使無干也內命夫卿大夫

士之在宮中者

賈疏若宮正所掌者也對在朝卿大夫士為外命夫其外命婦則總外內

命夫之妻內命婦  
即三夫人已下者

陸氏德明曰辟避也

掌埽門庭

埽四  
與反

正義鄭氏康成曰門庭門相當之地 賈氏公彥曰

惟中門外之庭閤人掌埽若餘門庭則各有守門者

婦之

大祭祀喪紀之事設門燎蹕宮門廟門凡賓客亦如之

正義鄭氏康成曰燎地燭也

賈疏燭在地曰燎天子百公五十侯伯子男皆

三十蓋百根葦以布纏之以蜜塗其上若今燭燭矣對人手熱者為手燭故云地燭也

蹕止行

者廟在中門之外

賈氏公彥曰喪紀謂大喪以下

朝廟及出葬時賓客謂若饗食在廟燕在寢皆設門

燎及蹕止行人

案宮正注祭先王先公於廟中隸僕蹕止行者宮正

則執燭以為明彼主宮中廟中此閤人主宮門廟門  
寺人掌王之內人及女宮之戒令相道其出入之事而

糾之

相息亮反下同  
道徒傲反後同

正義鄭氏康成曰內人女御也 王氏應電曰女宮

民間婦女服公事於宮中者戒所當禁之事令所當  
修之職 黃氏度曰女宮若女邊女酒之屬

存異鄭氏康成曰女宮刑女之在宮中者

案女宮下於女御一等則皆無爵而備使令執役者

明史謂之宮人亦稱都人是也女籩女醯之屬亦存焉以此職及世婦春官世婦參攷之則女宮皆從禮事之役夫豈以刑女為之抑當刑措之世無沒入之女奴不幾虛無人而廢乃事乎

若有喪紀賓客祭祀之事則帥女宮而致于有司佐世婦治禮事

正義鄭氏康成曰有司謂春官宮卿世婦

賈疏其職云掌女宮

之宿戒及祭祀比其具佐世婦則天官世婦也

案鄭氏鐸破鄭注謂宮卿世婦不宜稱有司固然而謂別有掌祭祀賓客喪紀之有司則誤矣外有司豈可帥女宮而致之哉但注過畧宜曰宮卿世婦之屬

耳

下大夫四人  
中士八人

或曰內小臣內豎職皆曰祭祀賓

客喪紀此職獨曰喪紀賓客祭祀何也主王后內人而言則先吉而後凶主女宮而言則先其執事之多

而後其少也

王后所與惟宗廟之祭賓客則勞饗歸禮並共簠方邊豆壺事較繁重若喪紀

則兼有喪祭喪賓序哭弔臨女宮執事為多故以是為差

掌內人之禁令

正義黃氏度曰上言戒令謂在宮有警戒之令此又言禁令謂有時出宮弔臨于外則又有禁止之令案禁令禁其非有禮事則不得出也

凡內人弔臨于外則帥而往立于其前而詔相之

正義鄭氏康成曰從世婦所弔若哭其族親立其前者賤也詔相之者出入王宮不可以闕於禮

賈疏世婦掌弔

臨於卿大夫之喪女御得從之王后有哭族親之法則內人理亦宜然

案注謂女御賤故寺人立於其前未安非立于其前不可以詔相禮事即內小臣擯王后亦然經特於此著之耳

內豎掌內外之通令凡小事

豎蜀羽反

正義鄭氏康成曰內后六宫外卿大夫也使童豎通王內外之命給小事者以其無與為禮出入便疾案所通獨小事之令也知然者王之陰事陰令內小臣掌之也不曰掌通內外小事之令而曰掌內外之



通令凡小事者所掌不獨內外小事之令而兼給小事也

若有祭祀賓客喪紀之事則為內人蹕偽反

正義鄭氏康成曰內人從世婦有事於廟者賈疏內人卑不

專行事案下世婦職掌祭祀已下三事與此同明此內人從世婦而濯概及為粢盛也賓客在廟謂饗食時也喪紀在廟謂喪朝廟為祖奠遣奠時內豎為內人蹕者以其掌內小

事

案寺人帥內人弔臨不言蹕而內豎言蹕何也祭祀

賓客喪紀內人出入廟中所辟止乃執事之羣臣惟  
內豎導行可使之蹕若弔臨於外出宮則閤人為之  
闢在途則有司為之蹕不待言也公卿大夫有事於  
國中郊野鄉士遂士縣士皆為之蹕則內人可知  
王后之喪遷于宮中則前蹕及葬執褻器以從遣車

正義鄭氏康成曰喪遷者將葬朝於廟

賈疏喪柩遷於宮中惟有

朝廟時檀弓周

朝而遂葬是也褻器振飾頽沐之器

賈疏王府職褻器注以為清器

虎子彼據生時與床第等連文也知此為振飾頽沐器者案特牲為尸而有槃匱并有簞巾巾為振飾槃

匱為盥手明其頰面沐髮亦有之故既夕禮用器之中有槃匱是送葬之時有褻器也

賈氏

公彥曰執褻器以從遣車者謂朝七廟訖旦將行在大祖廟中設大遣奠苞牲取下體天子大牢苞九箇遣車九乘后亦同使人持之如墓遣車載牲體鬼神依之故使內豎執褻器以從若生時王氏應電曰在宮中故內豎蹕出宮門則閤人蹕矣

案曾子問天子崩諸侯薨祝取羣廟之主而藏於祖廟卒哭成事而後主各反其廟則喪遷時羣廟之主

尚未反也朝廟直朝大廟而已疏謂朝七廟訖旦將行然後設奠於太祖之廟理不宜然詳見士喪禮下篇

九嬪掌婦學之灋以教九御婦德婦言婦容婦功各帥其屬而以時御叙于王所

帥所  
聿反

正義鄭氏康成曰婦德謂貞順婦言謂辭令婦容謂婉婉婦功謂絲枲御猶進也勸也進勸王息亦相次

序

賈疏昭公元年左傳君子晝以訪問夜以安身女者定男於夜節宣其氣故云勸王息也

案夫人見於經而祭祀賓客喪紀贊王后之禮事掌婦學之法皆首九嬪亦猶三公之或以六卿兼之而不自列職有無不定也 王齊喪及大荒大札天地有裁邦有大故皆出次故曰以時御叙明非其時則不御也

存疑鄭氏康成曰自九嬪以下九九而御於王所凡羣妃御見之法月與后妃其象也卑者宜先尊者宜後賈疏禮運三五而盈三五而闕后以下法之故從微嚮著卑者宜先從著嚮微卑者宜後也 女

御八十一人當九夕世婦二十七人當三夕九嬪九人當一夕三夫人當一夕后當一夕亦十五日而徧云自望後反之孔子云日者天之明月者地之理陰

契制故月上屬為天使婦從夫放月紀

賈疏孔子云已下孝經緯

援神契文

凡祭祀贊玉盞贊后薦徹豆籩

盞音咨注故書玉為王杜子春讀為玉

正義鄭氏康成曰玉盞玉敦受黍稷器后進之而不徹賈氏公彥曰后無外事唯有宗廟之祭但祭祀

時男子進俎婦人設豆籩簠簋其簋則九嬪執而授后后設之豆籩之薦與徹皆助后

案王安石用故書贊王盥以為上言贊王下言贊后言之序也鄭氏鍔辨之謂大宗伯奉玉盥小宗伯逆盥肆師表盥盛告潔為贊王九嬪所贊為贊后似矣而猶未盡析也宗伯奉玉盥無天神地祇言之若宗廟則攝后耳后親祭則后設而九嬪贊焉無所用宗伯矣豈可混為一事乎贊者贊其設也小宗伯之逆

肆師之表告皆前此之事不可謂贊少牢饋食禮主  
婦薦自東房韭菹醯醢坐奠于筵前主婦贊者一人  
執葵菹羸醢以授主婦主婦不興遂受陪設于東韭  
菹在南葵菹在北此謂贊薦豆籩也又云主婦自東  
房執一金敦黍有蓋坐設于羊俎之南婦贊者執敦  
稷以授主婦主婦興受坐設于魚俎南又興受贊者  
敦黍坐設于稷南又興受贊者敦稷坐設于黍南敦  
皆南首此謂贊設黍稷也九嬪之贊后蓋亦如是邦



國禮亡凡喪祭要須據儀禮以推之安石廢棄儀禮  
目所不經宜其多悖也 玉璽后不徹者為其已餒  
且不以入于房也特牲饋食禮宗婦徹祝豆籩入于  
房徹主婦薦俎教氏繼公曰此所徹者皆置于房故  
宗婦得為之宗婦所不徹后可知矣后徹豆籩入于  
房亦重神餘故改設也先儒或以為燕內賓也  
若有賓客則從后

正義鄭氏康成曰當贊后事 賈氏公彥曰后之有

事于賓客者唯諸侯來朝王親饗后當助王饗時九  
嬪從后往也

大喪帥叙哭者亦如之

正義鄭氏康成曰亦從后帥猶道也后哭衆次叙者  
乃哭

案外宗叙外內朝莫哭者叙其班之先後次第也九  
嬪則帥以從后使依次哭而已亦見后夫人而下九  
嬪為班次之先者也喪必有內主無則或攝之若后

喪則亦帥以從

世婦掌祭祀賓客喪紀之事帥女宮而濯概為齋盛

概古

反愛

正義賈氏公彥曰婦人所掌祭祀謂祭宗廟賓客謂

饗食諸侯在廟喪紀謂大喪朝廟設祖奠與大遣奠

時少牢禮饗人概鼎俎廩人概甑甗司宮概豆籩彼

大夫家無婦官故使男子天子備官故異鄭氏康

成曰概拭也為猶差擇

賈疏祭祀黍稷春人春之饌人炊之故知世婦所謂為是

差擇

案祭祀賓客共米者春人共盛者饎人也世婦帥女  
宮而濯概此女宮即指女春女饎而言世婦親之則  
饎饔當在西堂下少牢大夫禮廩饔與雍饔同在門  
外東南辟君禮也特牲禮饎饔在西堂下士卑不嫌  
也方濯概時未為齎盛也蓋濯概將以為齎盛耳不  
然則不知濯概者為何事喪紀之齎盛謂虞也饎饔  
在東堂下與吉祭反

及祭之日涖陳女宮之具凡內羞之物

正義鄭氏康成曰涖臨也內羞房中之羞 賈氏公  
彥曰春官世婦掌女宮之宿戒及祭祀比其具此直  
臨之而已內羞謂糗餌粉飧食糝食案少牢皆從  
房中而來故名內羞 王氏安石曰籩人醯人共內  
羞世婦涖陳之

案此女宮則凡女酒女籩女醯女醢女鹽女罍女府  
女史以及女饎凡有職于陳饋之事者並存焉

掌弔臨于卿大夫之喪

正義鄭氏康成曰王使往弔 賈氏公彥曰案司服  
公卿大夫皆王親弔之此使世婦往弔者此使世婦  
致禮物弔是大名雖致禮亦名為弔也大僕小臣職  
皆掌弔勞注云致禮

案王后所不親弔則使世婦往不言公孤不必言也  
舉卿大夫則內子命婦之禮同后與賓客之事而弔  
事多不親者不輕入諸臣之家也女巫職王后弔則

與祝前蓋王之周親若勲德重望者后無故時自當  
親弔也知此非掌王后弔臨之禮事者女御職從世  
婦而弔於卿大夫之喪士喪禮公使人弔公使人  
襚公使人賵而公又有親視其大斂者是則后雖親  
弔而仍有致禮物之事也賈疏之義亦當兼之以世  
婦掌之者世婦與卿大夫爵秩相當亦使人必以其  
爵之灋也

女御掌御叙于王之燕寢

正義鄭氏康成曰言掌御叙防上之專妬者

賈疏注意若使

九嬪世婦掌御叙則有妬嫉自專之事

於王之燕寢則王不就后宮息

也魏氏校曰或疑王每夕御女非所以保其躬曰

陽以博施為德陰性專妬故寬舉大數如此凡祭祀則齋疾病則齋遇災異則齋發大命臨羣臣則齋皆不近婦人其大寒大暑一歲之虛四時有厲氣一月之虛風雨震電之變一日之虛保身遠色御叙者必有所避焉而要在王之自戒慎也



以歲時獻功事

正義鄭氏康成曰絲枲成功之事

賈疏內宰職教九御使各有屬以作

二事即此  
獻功之事

凡祭祀贊世婦

正義鄭氏康成曰助其帥涖女宮

大喪掌沐浴

正義賈氏公彥曰沐用潘浴用湯始死為之於南牖

下

案此專言后之喪耳注兼王之喪非也大祝職大喪始崩以肆訖溲尸肆師職大喪大溲以訖則築鬻鬻人職大喪之大溲設斗共其鬻鬻則沐浴及共給湯物皆不以婦人明矣經所以不明著之者男子不死於婦人之手士庶人且然況天子乎

后之喪持筓

筓所甲反

正義鄭氏康成曰筓棺飾也持而從柩車

賈疏案禮器天子八

筓后喪亦同將葬向壙之時使女御持之左右各四人

案此女御持筓者亦坐於柩車與以女御不可使徒  
行而持筓也雜記諸侯執紼五百人后喪彌多可知  
從世婦而弔于卿大夫之喪

正義鄭氏康成曰從之數蓋如使者之介云

賈疏夫  
人象公

嬪象孤卿世婦象大夫女御象士介數依命  
數為差王之大夫四命世婦之從亦四人

女祝掌王后之內祭祀凡內禱祠之事

正義鄭氏康成曰內祭祀六宮之中竈門戶

賈疏祭  
法有戶

竈中雷門行注直云竈門戶婦  
人無外事無行與中雷諸祀也

禱疾病求瘳也祠報

福

掌以時招梗禴禳之事以除疾殃

梗古猛反禴古外反又戶外反禳如羊反

正義賈氏公彥曰招招取善祥

鄭氏康成曰梗禦

未至也除災害曰禴卻變異曰禳

賈疏梗者禦捍惡之未至禴者除去

見在之災禳者推卻見在之變異

王氏應電曰鬼神之事婦人信

之尤酷聖人因人情之所不能已制為正祀則淫祀

不禁而自止矣

女史掌王后之禮職

正義王氏昭禹曰王后之禮各有所職如祭祀則有薦徹賓客則有獻酬之類女史掌之庶王后非禮勿動矣

案后所行之禮命之曰職而女史掌之即內宰以陰禮教六宮詔后禮樂之儀之典籍也

掌內治之貳以詔后治內政

正義鄭氏康成曰內治之法本在內宰書而貳之案女史之於內宰猶大史之於冢宰也冢宰內宰掌

其正故大史女史掌其貳焉內宰雖治王內之政令  
究有男女之嫌必以女史詔后治內政而後便於事  
也

逆內宮

正義鄭氏康成曰鉤考六宮之計賈疏謂六宮所有  
費用財物及米粟  
皆當鉤  
考之

書內令

正義鄭氏康成曰后之令 賈氏公彥曰謂書而宣

布於六宮之中

凡后之事以禮從

正義鄭氏康成曰亦如大史之從王

賈疏大史職大會同朝覲以書

協禮事及將幣執書以詔王此女史亦執禮書以從后

典婦功掌婦式之灋以授嬪婦及內人女功之事齋

音齋

咨本又作淩注故書齋為咨杜子春讀為資

正義鄭氏康成曰婦式婦事之模範灋其用財舊數

嬪婦九嬪世婦言及以殊之者容國中婦人賢善工

於事者

賈疏知有國中婦人者下典絲職頒絲于外內工注云外工外嬪婦也大宰九職嬪婦化

治絲帛是國中婦人有嬪婦之稱也

鄭氏衆曰內人謂女御女功事

齋謂女功絲帛之事 黃氏度曰事齋治絲帛之事

及轉致雜費

案此嬪婦即大宰九職中嬪婦化治絲帛閭師掌國中四郊之人民任嬪以女事貢布帛者也典絲職頒絲于外內工注云外工外嬪婦也即此已內人女御則內工也云及者殊外內也先外後內者外工多也



式則大宰羞服之式中具焉女功猶言婦功 康成  
以九嬪世婦兼言之疑未必然九嬪世婦所司者禮  
職縱有婦功當非典婦功所掌也曾是九嬪世婦之  
尊而一絲一枲反授受於中下士之手乎凡經云嬪  
婦皆非九嬪世婦也蓋服用繁多匪寥寥內人所能  
共也故於國中四郊之內任嬪婦以其職而使治之  
以共王及后之用與其賜予其人在載師任土者之  
外所云九功之貢者皆然而嬪婦及內人之功則以

典婦功掌之典婦功猶今之司織造者

凡授嬪婦功及秋獻功辨其苦良比其小大而賈之物

書而梛之

苦音古賈音嫁梛其謁反  
下並同注讀授作受非是

正義鄭氏衆曰苦讀為監謂分別縑帛與布紵之麤

細皆比方其大小書其賈數而著其物若今時題署

物 鄭氏康成曰賈之者物不正齊當以泉計通功

王氏應電曰先授之功以齊其業然後受其獻以

責其成隆冬寒沍非女工時故秋獻功

案此直言嬪婦不言內人者內人之功事以歲時獻于后而內宰佐后受之不獻于典婦功也其授以女功之事齋則上文固言之矣以此益見嬪婦之為外嬪婦而不可以九嬪世婦當之也鄭云以泉計通功者謂若某物直幾十千或幾千也 比比次也物之大小賈固不同或大小同而材有美惡功有良苦則賈相倍蓰故比次而揭之以共衣服則貴賤有等以備賜予則輕重有差也

以共王及后之用頒之于內府

正義金氏瑤曰用謂六宮之服及王與后賜予

案疏謂以待王及后之用故藏于內府非也內府都受九貢九賦九功之貨賄非專共王及后者也蓋凡絲枲布帛皆藏于內府其成於內人者則以共王及后之用成於外工者則以共邦之百用耳王之燕衣服玉府掌之蓋授縫人縫之既成而後以入于玉府禮服則以授外內司服也

典絲掌絲入而辨其物以其賈楬之

正義賈氏公彥曰后宮所蠶之絲自於後宮用之以為祭服不入典絲其歲貢之絲若禹貢兗州貢漆絲之等當入典絲黃氏度曰以其賈楬之將以為授功獻功之程

辨正黃氏度曰康成以絲入為九職嬪婦所貢絲非也問師任嬪以女事貢布帛不貢絲此當是九貢禹貢兗州厥貢漆絲青州厥貢絲枲

掌其藏與其出以待興功之時

正義鄭氏康成曰時者若溫暖宜纁帛清涼宜文繡

賈疏文繡染絲為之  
夏暑損色故待秋涼

頒絲于外內工皆以物授之

正義鄭氏康成曰外工外嬪婦也內工女御 賈氏

公彥曰以物授之者若纁帛則授以素絲文繡則授  
以綵絲

案外內工即蒙上典婦功職之嬪婦及內人而言注

以外工為外嬪婦則上經嬪婦非九嬪世婦明矣  
凡上之賜予亦如之

正義鄭氏康成曰王以絲物賜人 王氏昭禹曰所  
賜予貴賤不同亦皆以其物授之

及獻功則受良功而藏之

良依注作苦  
一讀如字

正義鄭氏康成曰良當為苦字之誤也受其麤鹽之  
功以給有司之公用其良功者典婦功受之以共王  
及后之用 賈氏公彥曰典泉直有苦者無良者明

典絲亦不得有良者以良者入典婦功也

存異鄭氏衆曰良功絲功縑帛苦功麻功布紵

案典婦功職辨其苦良則絲帛皆有苦有良如即以

絲帛為別而已則又何辨之有其苦者謂次於良者

一等二等之差非濫惡者也一云凡良功皆藏於典

絲凡苦功皆藏於典帛名相近者相遠實相近者相

邇所以謹於藏便於用易於會計也不必改良為苦

亦通



辨其物而書其數以待有司之政令上之賜予

正義劉氏彝曰待有司之政令謂給邦之百用政令如下文祭祀喪紀所共飾邦器者所受之類

凡祭祀共黼畫組就之物

正義鄭氏康成曰以給衣服冕旒

賈疏衣服釋黼畫也周冕服九章自

龍衮已下此直言黼者若詩維衮及黼之類畧言之也冕旒釋組就也若弁師職五采繅十有二就之等

及依盥巾之屬

賈疏依盥巾亦釋黼也此據祭祀若掌次職設皇邸邸即屏風為黼文罽

人職王中皆黼

白與黑謂之黼

賈疏攷工記續人職文

采色一成曰就

賈疏若典瑞五采五就之等

賈氏公彥曰凡祭服皆畫衣繡裳

裳繡須絲衣畫不須絲而言共絲者大夫已上裳皆先染絲則玄衣亦須絲為之乃後畫故兼畫衣而言之組就者謂以組為冕旒之就物絲之物色

喪紀共其絲纊組文之物

纊音曠劉古曠反

正義鄭氏康成曰以給線纓

賈疏謂給裁縫之用此釋絲也

著盱口

綦握之屬

賈疏此釋纊組也按士喪禮握手用玄纊裏著組繫喪大記屬纊以俟絕氣內

則屨著綦注綦屨繫是用纊組之事

青與赤謂之文

賈疏亦續人職文繡亦用絲故連言

也

凡飾邦器者受文織絲組焉

正義鄭氏康成曰謂茵席屏風之屬

賈疏此據生人所飾器物言茵

若少儀所謂茵席枕几類之屬注茵著褥是也席謂席之四緣若司几筵粉純畫純黼純之屬是也屏風即上文注黼依上據祭祀此王所用若司几筵職依前者是也

王氏昭禹曰文

織以文為織絲組以絲為組

歲終則各以其物會之

正義鄭氏康成曰種別為計

賈疏自上經所用掌其藏與其出及黼畫已下

各別為計

鄭氏衆曰各以其所飾之物計會傳著之

賈疏

謂物之多少作文書使相傳著共一簿也

典泉掌布總縷紵之麻草之物以待時頒功而授齋

縷力

羽反紵音佇直語反注故書齋作資

正義鄭氏康成曰總十五升布抽其半者

賈疏禮記雜記文

白而細疏曰紵雜言此數物者以著其類衆多草葛

藟之屬 賈氏公彥曰布總縷用麻物紵用草物布

中可以兼用葛藟之草為之待時頒功者用絲有四

時之別麻草所為四時皆得

案掌布總縷紵之麻草之物者麻草之物不獨用於  
布總縷紵而典臬所掌惟此也授齋蓋給以臬布使  
自具練治麻草之器物兼償其勞也於頒臬曰授齋  
則絲可知也於頒絲曰外內工則臬可知也

及獻功受苦功以其賈楬而藏之以待時頒

正義鄭氏康成曰其良功亦入于典婦功以共王及  
后之用

頒衣服授之賜予亦如之歲終則各以其物會之

正義鄭氏康成曰授之授受頒者帛言待有司之政  
令布言頒衣服互文 賈氏公彥曰典絲典枲俱不  
為王及后之用

內司服掌王后之六服褱衣揄狄闕狄鞠衣展衣緣衣

素沙

褱音暉揄音遙鞠居六反又溪六反展張彥反緣或作緣同吐亂反

正義鄭氏衆曰褱衣畫衣也祭統君卷冕立于阼夫

人副褱立于東房

賈疏彼據二王後夫人祭服褱衣與后同

揄狄闕狄畫

羽飾展衣白衣也喪大記復者朝服君以卷夫人以

屈狄世婦以褴衣屈音聲與闕相似褴與展相似鞠

衣黃衣也鄭氏康成曰狄當為翟翟雉名伊雒而

南素質五色皆備成章曰翟江淮而南青質五色皆

備成章曰搖

賈疏伊雒而南已下至此皆爾雅文引之者證褴揄為雉也

王后之

服刻繒為之形而采畫之綴於衣以為文章褱衣畫

翟者揄翟畫搖者

賈疏先鄭褱衣揄狄不言所畫故足成其義

闕翟刻而

不畫

賈疏此無正文以意量之明刻繒為雉形但闕而不畫五色

此三者皆祭服

從王祭先王則服褱衣祭先公則服揄翟祭羣小祀

則服闕翟今世有圭衣者蓋三翟之遺俗鞠衣黃桑

服也色如鞠塵象桑葉始生月令三月薦鞠衣于先

帝告桑事展衣以禮見王及賓客之服

賈疏諸侯為賓客於王后

助王饗賓則后有見賓之禮亦服展衣也鞠衣在上以桑祿衣在下以御于王展衣在中故以為見王及賓客字當為禮禮之言亶亶誠也詩國風曰玼兮玼

之服

兮其之翟也又曰璫兮璫兮其之展也雜記夫人復

稅衣揄狄又喪大記士妻以祿衣言祿者甚衆字或



作稅

賈疏或雜記文

此緣衣實祿衣也祿衣御於王之服亦

以燕居

賈疏朝服展衣下唯有祿衣故知御與燕居同祿衣也

男子之祿衣黑

則是亦黑也

賈疏男子祿衣黑禮雖無文案士冠禮陳服於房爵弁服皮弁服祿衣當玄

禮陳襲事於房亦云爵弁服皮弁服祿衣當玄端之處變言之者冠時玄端衣裳別及死襲時玄端連衣裳與婦人祿衣同故雖男子之玄端亦名祿衣又見子羔襲用祿衣纁袖譏襲婦服纁袖與玄衣相對之物則男子祿衣黑矣男子祿衣既黑則婦人祿衣亦黑可知

六服備於此矣以

下推次其色則闕狄赤揄狄青褱衣玄

賈疏王后六服其色無文

以鞠衣象麤塵其色黃祿衣與男子祿衣同其色黑二者為本以五行之色從下向上以次推之水色黑

祿衣既象之水生於金祿衣上有展衣宜象金色故先鄭亦云展衣白衣也金生於土土色黃鞠衣象之土生於火火色赤鞠衣上有闕翟則闕翟象之火生於木木色青闕翟上有揄翟則揄翟象之五行之色已盡唯有天色玄禕衣最在上象天色 婦人尚專一德無所兼連衣裳

不異其色素沙者今之白縛也六服皆袍制

賈疏雜記繭衣

裳是袍也男子袍有衣裳婦人衣裳連則非袍而云袍制者止取衣複不單與袍制同

以白縛

為裏使之張顯今世有沙縠者名出於此

賈氏公

彥曰王之吉服有九韋弁以下常服有三與后鞠衣以下三服同但王之祭服有六后祭服惟有三翟者

天地山川社稷等后夫人不與故三服而已禕衣亦是翟而云衣者以其是服之首故目言衣也鄭氏鶚曰天子之服九九者所以取乎陽數之極王后之服六六者所以取乎陰數之中禕言衣則知揄闕者亦衣也揄狄闕狄言狄則知禕衣亦狄也

辨外內命婦之服鞠衣展衣緣衣素沙

正義鄭氏康成曰內命婦之服鞠衣九嬪也展衣世

婦也緣衣女御也

賈疏九嬪下有世婦女御三等鞠衣以下服亦三等故知以次服之

外命婦其夫孤也則服鞠衣其夫卿大夫也則服展

衣其夫士也則服緣衣

賈疏此約司服孤絺冕卿大夫同玄冕士皮弁三等而言

之孤以下妻其服無文故以此三等之服配三等臣之妻也

三夫人及公之妻其

闕狄以下乎

賈疏婦人之服六從下向上差之三夫人當服闕狄三公夫人亦當闕狄若三

夫人從上向下差之則當揄狄玉藻王后褱衣夫人揄狄是也若三公夫人不得過闕狄知者射人職三公執壁與子男同則三公亦

侯伯之夫人揄狄子男

之夫人亦闕狄惟二王後褱衣

賈疏玉藻君命闕狄再命鞠衣一命褱衣

注據子男之國而言闕狄既當子男夫人侯伯夫人自當揄狄二王後夫人當褱衣矣

賈氏

公彥曰上言后六服此論外內命婦不得有六服唯  
得鞠衣以下三服尊卑差次服之而已亦以素沙為  
裏司服孤卿大夫士文承諸侯之下皆據諸侯之臣  
言則諸侯之臣妻亦以次受此服是以玉藻君命闕  
狄再命褱衣一命褱衣士褱衣注云此子男之夫人  
及其卿大夫士之妻命服也褱當為鞠諸侯之臣皆  
分為三等其妻以次受此服若然五等諸侯之臣命  
雖不同有孤之國孤絺冕卿大夫同玄冕無孤之國

則卿締冕大夫玄冕其妻皆約夫而服此三等之服  
天子之臣服無文亦得與諸侯之臣服同是以此外  
命婦服亦得與諸侯臣妻服同也

存疑鄭氏鍔曰三公之妻不可以常制論三公出封  
則為大國之君以君子偕老之詩觀之衛侯爵詩人  
言夫人之服曰翟曰展上三衣有翟下三衣有展其  
下王后一等無褱衣而已蓋三公在朝屈於王則服  
子男之服其妻亦服闕狄出封則宜加禮記有夫人

副禕之文其三公出封之禮與三夫人之服亦不可  
以常制論中宮有后則屈而服闕狄中宮或闕則伸  
而服揄狄與侯伯在朝及出封其妻之服闕狄揄狄  
同 陳氏祥道曰王制言三公一命袞則三公在朝  
驚冕其妻揄狄可知也玉藻言夫人揄狄則三夫人  
揄狄可知也公之夫人禕衣而明堂位言魯夫人副  
禕者魯侯得用袞冕則夫人副禕可知也 王氏應  
電曰以司服之例推之自上公九命其服九章至再

命受服二章而止三公夫人八命天子之三夫人視之卿之內子六命天子之九嬪視之是皆當有八章六章之服大夫之世婦四命天子之二十七世婦視之大國孤之婦亦四命是皆當服鞠衣元士之妻三命天子之女御視之侯國卿之內子亦三命並當服展衣天子中士之妻侯國大夫之婦小國卿之內子皆再命並當服緣衣且以后之六服止畫雉之一章何以為九命之別王與諸侯之袞名同制異則后與



夫人之禕亦當有辨

凡祭祀賓客共后之衣服及九嬪世婦凡命婦共其衣

服共喪衰亦如之

衰七雷反

正義鄭氏康成曰言及言凡殊貴賤也凡者凡女御與外命婦也春秋之義王人雖微者猶序乎諸侯之

上所以尊尊也

賈疏據上文外內命婦服唯有鞠衣已下此經上已云九嬪世婦則內命

婦中唯有女御也外命婦中有公孤卿大夫之妻尊於女御而總入女御中又九嬪卑於三公夫人世婦卑於孤卿妻言凡以殊之在上是尊尊也春秋會王人在僖八年臣之命者再命以

上受服則下士之妻不共也

賈疏大宗伯職再命受服則天子下士一命不

受外命婦唯王祭祀賓客以禮佐后得服此上服自

於其家則降焉

賈疏特牲禮主婦纁笄綃衣少牢禮主婦被錫衣侈袂士妻不衣祿衣大

夫妻綃衣侈袂不衣展衣是自於其家則降也

賈氏公彥曰共后之衣服

者祭祀共三翟賓客共展衣九嬪世婦謂助后祭祀

賓客時凡命婦兼外內命婦也喪衰外命婦為王服

齊衰於后無服若九嬪已下及女御於王服斬衰於

后服齊衰

案疏引特牲少牢主婦之服以為非助祭不服上服之證是也但大夫妻以展衣為上服則祭於已猶得服緣衣不應綃衣下同士妻也敖氏繼公以少牢錫字古文作錫而謂為緣字之訛即此經之緣衣良為可據士妻綃衣士昏禮特牲禮並見之當在緣衣之下蓋亦士妻之禮服而此經不以入等未詳 喪服外命夫為王服斬衰故外命婦服齊衰從夫服而降一等也外命夫為后服齊衰從王服也凡從服一從

而已無累從者故外命婦於后無服諸侯及諸侯之夫人於王與后亦然詳見喪服經傳

后之喪共其衣服凡內具之物

正義賈氏公彥曰后喪所共衣服謂襲時十二稱小歛十九稱大歛百二十稱鄭氏康成曰內具紛帨

線纊鞶褱之屬

賈疏內則婦事舅姑有紛帨線纊鞶褱故死者入壙亦無有數物內則更

有刀礪小觶等故曰之屬

縫人掌王宮之縫線之事以役女御以縫王及后之衣

服線私見反

正義鄭氏衆曰線縷也 鄭氏康成曰女御裁縫王及后之衣服則為役助之餘裁縫事則專為焉 賈氏公彥曰役女御謂為女御所役

案序官云奄二人女御八人女工八十人奚三十人此云以役女御則奄特總帥女工及奚以聽女御之役使耳王及后之衣服女御司之既成乃分入於玉府及外內司服而以共也此與內司服之女御蓋即

於八十人中選充之王昭禹以為非王宮之女御

繆也

喪縫棺飾焉

注故書焉為馬杜子春云當為焉

正義鄭氏康成曰孝子既啟見棺猶見親之身既載

飾而行遂以葬若存時居於帷幕而加文繡

賈疏既載飾而

行者既夕禮曰側遂匠納車於階間卻柩而下載之於蜃車之上乃加帷荒飾棺訖乃還車向外明日旦乃引向壙加文繡者生時帷幕無文繡今死恐衆惡其親更加文繡喪大記飾棺君龍

帷三池振容黼荒火三列黻三列素錦褚加偽荒

賈疏

偽即帷也

纁紐六齊五采五貝黼翬二黻翬二畫翬二皆

戴圭魚躍拂池君纁戴六纁披六此諸侯禮也

詳見喪大

記禮器天子八翬諸侯六大夫四漢禮器制度飾棺

天子龍火黼黻皆五列又有龍翬二其戴皆加璧

衣翬柳之材

衣於既反注故書翬柳作接櫨鄭司農云接讀為跽櫨讀為柳皆棺飾

正義鄭氏康成曰必先纁衣其材乃以張飾也柳之

言聚諸飾之所聚也檀弓周人牆置翬春秋傳四跽

不跽

賈疏襄二十五年左傳跽作翬

賈氏公彥曰翬如方扇柳即

上注引喪大記帷荒是也二者皆木材以綵繒衣纏之乃後張飾於其上故云衣翬柳之材

掌凡內之縫事

案凡內之縫事則不獨衣服也不獨王與后之衣服也

染人掌染絲帛

正義劉氏彝曰凡染事染而後織者上也織而後染者次也



凡染春暴練

暴步卜反  
劉步落反

正義鄭氏康成曰暴練練其素而暴之

賈疏素即絹也此謂湏練

而用者非謂祭服若祭服則先染絲織之不得為練

賈氏公彥曰春時陽氣

燥達故暴曬其練

王氏昭禹曰幌氏練絲帛皆晝

暴諸日是也

夏纁玄

注故書纁作窰鄭司農云窰當讀為纁

正義鄭氏衆曰纁謂絳也

賈疏即爾雅及鍾氏所云三入為纁

鄭氏

康成曰謂夏始可以染此色也玄纁者天地之色以

為祭服

賈疏易云黃帝堯舜垂衣裳取諸乾坤但天玄地黃而纁者土無正位託位南方火火色

赤與黃共為纁也凡六冕之服皆玄上纁下故云以為祭服

石染當及盛暑熱潤

始湛研之

賈疏約攷工記鍾氏職而言夏暑熱潤之時以朱湛丹梳易可和釋故夏染纁玄

三月而後可用考工記鍾氏則染纁術也染玄則史

傳闕矣

賈疏鄭注鍾氏及士冠禮云玄則六入與

秋染夏

夏戶雅反後除春夏之字皆同

正義鄭氏康成曰染五色謂之夏夏者其色如夏秋

禹貢羽畎夏翟是其總名其類有六曰翬曰搖曰鴈

曰留曰希曰蹲

賈疏爾雅文

其毛羽五色皆備成章染者

擬以為淺深之度是以放而取名焉 賈氏公彥曰

秋氣涼可以染五色 鄭氏鏗曰秋氣收而不散五

色皆宜故染夏

冬獻功

正義賈氏公彥曰纁玄與夏至冬功成並獻之

掌凡染事

正義易氏祓曰凡染事不特絲帛而已 王氏應電

曰謂布總縷紵之物

案鄭氏鍔引禮記謂宮中所染專共王祭祀之服染人所掌以共國家禮事非也記所謂朱綠之玄黃之

即以付染人耳

追師掌王后之首服為副編次追衡笄

追都隈反編卑煙反又步典反

正義鄭氏衆曰副者婦人之首服祭統君卷冕立于

阼夫人副褱立于東房衡維持冠者春秋傳衡統紘

紘

賈疏桓二年臧哀伯辭彼據男子之衡司農意男子婦人皆有衡也

鄭氏康成曰

副之言覆所以覆首為之飾其遺象若今步繇矣服之以從王祭祀編編列髮為之其遺象若今假紒矣服之以桑也次次第髮長短為之所謂髮髭服之以

見王王后之燕居亦纚笄總而已

賈疏康成知三翟之首服副鞠衣展

衣首服編祿衣首服次者王之祭服有六首服皆冕則后之祭服有三首服皆副可知昏禮女次純衣純衣則祿衣祿衣而云次則祿衣首服次可知其中亦有編明配鞠衣展衣也上注展衣云以禮見王則展衣首服編此云次以見王者以禮朝見於王與見賓客同則服展衣與編接御見王則祿衣與次也燕居謂不至王所自在燕寢時齊風雞鳴毛傳東方明則夫人纚笄而朝此經注云副編次以待祭祀賓客明

燕居不得著次自然著纓笄而毛云以朝必別有所見康成不破之者以纓笄燕居無正文也其實朝王時首服編追猶治也詩云追琢其章王后之衡笄皆以玉

為之

賈疏弁師王之笄以玉故知后同用玉

惟祭服有衡垂於副之兩

旁當耳其下以紃懸瑱詩玉之瑱也是也笄卷髮者

賈氏公彥曰弁師職云諸公用玉為瑱詩玉之瑱

也據諸侯與夫人同用玉瑱則衡笄亦用玉矣其三夫人與三公夫人同服翟衣則衡笄亦用玉矣其九嬪命婦等當用象也云唯祭服有衡者見經后與九

嬪已下多別言則衡筭唯施於翟衣鞠衣已下無衡矣鞠衣已下雖無衡亦應有紃以懸璜也

辨正賈氏公彥曰先鄭謂追師掌冠冕之官故并知王后之首服後鄭不從者追師若兼掌男子之首服亦當如下屨人職掌王及后之服屨今不云明非共掌

為九嬪及外內命婦之首服以待祭祀賓客喪紀共筭經亦如之

正義鄭氏康成曰外內命婦衣鞠衣褱衣者服編衣緣衣者服次非王祭祀賓客佐后之禮自於其家則亦降焉少牢饋食禮主婦被錫衣侈袂特牲饋食禮主婦纚笄宵衣是也昏禮女次純衣攝盛服耳主人

爵弁以迎侈袂祿衣之袂

賈疏案昏禮女次純衣純衣則祿衣據士服爵弁親

迎攝盛則士之妻服祿衣首服次亦攝盛祿衣既首服次三翟首服副則鞠衣褱衣首服編可知凡

諸侯夫人於其國衣服與王后同

賈疏所同者上公夫人得祿衣以下

至祿衣祿衣從君見大祖掄翟從君祭羣廟闕翟從君祭羣小祀鞠衣以桑展衣以禮見君及賓客祿衣



以御侯伯夫人得揄翟以下揄翟從君祭大祖及羣廟闕翟以下與上公夫人同子男夫人得闕翟以下闕翟以祭鞠衣以下與侯伯夫人同並纁翟絺衣以燕居也二王之後與魯夫人亦同上公之禮

賈氏公彥曰以待祭祀賓客者亦謂助后而服之

王氏應電曰筓經者筓與經也儀禮喪服傳有箭筓有惡筓有吉筓惡筓者櫛筓亦曰榛筓吉筓者象筓也惡筓有有首者吉筓有折其首者服之重輕以是為差

案二夫人亞王后內官列職自九嬪始舉九嬪而言

及則內命婦為世婦女御明矣疏謂不言世婦大略  
內命婦惟女御未安

屨人掌王及后之服屨為赤舄黑舄赤纁黃纁青句素

屨葛屨

屨九裕反舄西益反  
纁衣亟反句音劬

正義鄭氏康成曰連言服者著服各有屨也複下曰

舄禪下曰屨

賈疏下謂底重底者  
名舄禪底者名屨

舄屨有約有纁有

純者飾也句當為約約著舄屨之頭為行戒

賈疏約謂以條

為之狀如刀衣鼻  
綴於屨頭為行戒

纁縫中紉純緣也

賈疏纁是牙底  
相接之縫綴條

於其中純謂以條為口緣經不云純文略也

天子諸侯吉事皆舄其餘唯

服冕衣翟著舄耳

賈疏服冕謂孤卿大夫衣翟謂后以下婦人也

素屨非純

吉有凶去飾者

賈疏大祥除衰杖後身服素縞麻衣著素屨故云非純吉言去飾者素屨

無絢纁也

言葛屨明有用皮時

賈疏葛屨自赤舄已下夏則用葛為之冬則用

皮為之在素屨下者欲見素屨亦用葛與皮也

鄭氏衆曰赤纁黃纁以赤

黃之絲為下緣士喪禮夏葛屨冬皮屨皆纁緇純禮

家說纁亦謂以采絲礫其下

王氏安石曰司服言

弁則曰弁服弁在上也屨人言屨則曰服屨屨在下

也

存疑鄭氏康成曰凡烏屨各象其裳之色士冠禮元

端黑屨

賈疏玄端有玄裳黃裳雜裳今云黑屨者據玄裳為正也

青絢纁純素積

白屨緇絢纁純爵弁纁屨黑絢纁純是也

賈疏引之見屨同裳

色王吉服有九烏有三等赤烏為上冕服之烏

賈疏吉服

有九者司服六冕及韋弁皮弁冠弁是也烏有三等者赤烏白烏黑烏也赤烏為六冕之烏白烏配韋弁皮弁服黑烏配冠弁服冕服六其裳同故以一烏配之

詩王錫韓侯元袞赤烏

則諸侯與王同下有白烏黑烏王后吉服六唯祭服

有烏玄烏為上褱衣之烏也下有青烏赤烏鞠衣以

下皆屨耳

賈疏后翟三等連衣裳而色各異故三翟三等之烏配之玄烏為褱衣之烏青烏配

搖翟赤烏配闕翟云鞠衣以下皆屨者六服三翟既以三烏配之且下文命夫命婦唯言屨不言烏故知

鞠衣以下皆屨也

絢纁純同色

賈疏士冠禮三冠絢纁純各自同色

今云赤纁

黃纁青絢雜互言之明烏屨衆多反覆以見之凡烏

之飾如纁之次

賈疏此無正文約皮弁白屨黑絢纁純白黑比方為纁次爵弁纁屨黑絢

纁純黑赤南北相對尊祭服故為纁次赤纁者王黑

烏之飾黃纁者后玄烏之飾青絢者王白烏之飾言

纁必有絢純言絢亦有纁純三者相將

賈疏凡屨皆絢純

三者相將謂各舉其一以互見也

王及后之赤舄皆黑飾后之青舄

白飾凡屨之飾如繡次也黃屨白飾白屨黑飾黑屨青飾士爵弁纁屨黑絢純尊祭服之屨飾從纁也

王氏昭禹曰赤陽之正色故王服赤舄黑陰之正

色故后服黑舄陽則純故赤舄之纁亦赤陰則雜故黑舄之纁黃黃陰之盛色以陰之正色為體以陰之盛色為飾也

案康成所言舄屨之差與其飾多補經文所未有者大概皆從士冠禮三屨推之而以屨象裳色一句為之柄其云屨飾如繡次者蓋於黑屨白屨偶合焉至纁屨不以白飾則云尊祭服如舄之續次也舄如續次經無明文特即纁屨比類而意其然耳其用心可謂苦矣然案之經文則衮黻不相入無怪後人之紛紛滋議也經上言王及后下言赤舄黑舄則赤舄者王之舄也黑舄者后之舄也順文次之則赤纁黃纁

當為赤舄之飾青句當為黑舄之飾或言纁或言句  
舉一以見其餘也赤舄而赤纁者王用之赤舄而黃  
纁者則公侯以下用之與黑舄而青句亦與黑屨之  
青絢肖也祭服之舄止此似更無他色者然則舄之  
飾固不如纁次而屨順裳色亦不可通之於舄矣果  
如康成說則經文不完已甚何以立灋示後且赤舄  
王之上也而乃以為后之下可乎三等之屨蓋貴賤  
所同故經不言之不然則素屨之上其有脫文與



赤舄夏亦未必以葛為之

辨外內命夫命婦之命屨功屨散屨

正義鄭氏康成曰命夫之命屨纁屨

賈疏經不云舄唯云屨者大夫

已上衣冕則有命舄而無命屨士

命婦之命屨黃屨

以下

賈疏外命婦孤妻已下內命婦九嬪已下不得服舄皆服鞠衣已下故屨以黃兼有卿大夫妻

及二十七世婦皆展衣白屨士妻與女御皆祿衣黑屨故云黃屨已下也功屨次命屨於

孤卿大夫則白屨黑屨

賈疏司服職孤絺冕卿大夫玄冕皆以赤舄為命舄以下

仍有皮弁白屨冠弁黑屨故云功屨次命屨據婦人而言其實孤卿大夫則功屨次命舄也九嬪

內子亦然

賈疏九嬪與孤妻內子既以黃屨為命屨功屨之中有禮衣白屨祿衣黑屨故云亦

然

世婦命婦以黑屨為功屨

賈疏皆以禮衣白屨為命屨其功屨唯有祿衣

黑屨

女御士妻命屨而已

賈疏女御士妻唯祿衣黑屨為命屨

士及士妻

謂再命受服者

賈疏大宗伯職一命受職再命受服但公侯伯之士一命子男之士不命

及王之下士皆受職不受服王之中士再命上士三命已上乃受服受服則并得此屨也散屨亦

謂去飾

賈疏此言散即上之素皆是無飾互言之

案云辨者命屨初命時官所給其後則與功屨皆自

為之故第辨其法式也

存疑賈氏公彥曰鄭志趙商問司服王后六服之制  
目不解請圖之答曰大裘衮衣鷩衣毳衣絺衣玄衣  
六服皆纁裳赤舄韋弁衣以韎皮弁以布二弁皆素  
裳白舄冠弁服黑衣裳而黑舄冠弁玄端也禕衣玄  
舄首服副從王見先王揄翟青舄首服副從王見先  
公闕翟赤舄首服副從王見羣小祀鞠衣黃屨首服  
編以告桑禮衣白屨首服編以禮見王祿衣黑屨首  
服次以御於王后服六翟三等三舄玄青赤鞠衣以

下三屨黃白黑婦人質不殊裳屨烏皆同裳色也

凡四時之祭祀以宜服之

正義鄭氏康成曰祭祀而有素屨散屨者惟大祥時

賈疏以此經四時祭祀總結上文諸屨故知有此二屨也云惟大祥時者此據外內命夫為王斬衰而言初死著常屨卒哭與齊衰初死同疏屨既練與大功初死同繩屨大祥與小功初死同吉屨無絢是以上經注云非純吉也

王氏昭禹曰以宜服之者各隨其時與

事之宜而服之若夏則葛屨冬則皮屨此隨時之宜

若吉祭用赤烏黑烏命屨喪祭有素屨散屨此隨事

之宜

夏采掌大喪以冕服復于大祖以乘車建綏復于四郊

夏戶雅反大祖音泰乘繩  
證反綏依注作綏如追反

正義鄭氏康成曰求之王平生常所有事之處冕服

不出宮故以復於大廟王祀四郊乘玉路建大常故

建綏以復去其旒異之於生也

賈疏生時有綏有旒

故書綏為

禮杜子春云當為綏禮非是某謂明堂位有虞氏之

旂夏后氏之綏則綏當作綏字之誤也綏以旌牛尾

為之綴於幢上所謂注旄於干首者

賈疏注據爾雅文按鍾氏染鳥

羽以為王后之車飾亦為旌旂之綏則旌旂亦有鳥羽獨云旌牛尾者舉一而言其實兼有也

士冠

禮及玉藻冠綏字故書亦多作綏者今禮家定作綏

鄭氏衆曰復謂始死招魂復魄士喪禮士死于適

室復者一人以爵弁服升自東榮中屋北面招以衣

曰畢某復三降衣于前受用篋升自阼階以衣尸喪

大記復男子稱名婦人稱字唯哭先復言死而哭哭

而復冀其復反故檀弓曰復盡愛之道也望反諸幽

求諸鬼神之道也北面求諸幽之義也又曰君復于小寢大寢小祖大祖庫門四郊喪大記又曰復者朝服君以卷夫人以屈狄大夫以元纁世婦以褱衣士以爵弁士妻以稅衣雜記諸侯行而死于館則其復如于其國如于道則升其乘車之左轂以其綏復大夫死于館則其復如于家死于道則升其乘車之左轂以其綏復喪大記又曰為賓則公館復私館不復夏采天子之官故以冕服復於大祖以乘車建綏復

於四郊天子之禮也大祖始祖廟也

案夏即染人秋染夏之夏謂以鳥羽飾旌旂之幢也此官以夏采為名則凡以鳥羽飾物如全羽為旒析羽為旌之類皆當掌之王巡守會同祭祀必有所共之事郊射或共其獲旌非專掌復也然則掌字之下盖有脫文大喪以下特其後語耳未有以偶然一見之事而專設一官者也復而後行死事則復者須臾之頃耳下士四人則大祖而外四郊亦未必全復矣



復于四郊猶宋玉招魂求諸上下四方之意非以郊祭故也檀弓亦曰君復於四郊謂諸侯也諸侯無郊祭也且不于壇而于郊不以冕服而以建綏足以見之矣 復者人之終也春秋傳晉侯有疾秦醫和謂趙孟曰國之大臣榮其寵祿任其大節有灾禍興而無改焉必受其咎今君至于淫以生疾將不能圖卹社稷禍孰大焉主不能禦吾是以云也王之宮寢内外起居飲食無一不關於冢宰直至君之身終而師

保之責猶無已焉此天官之屬所以終於夏采也與  
存疑賈氏公彥曰以袞冕以下六冕及爵弁皮弁之  
等復復者各依命數天子則十有二人天子七廟此  
經直云大祖則后稷廟也復者命士不命之士皆一  
人若大夫以上皆依命數

總論陳氏傅良曰冢宰一職所制御者皆關於君身  
君德一則環衛之人二則供奉飲膳酒漿之人三則  
出內財賄之人四則宮中使令之人

案冢宰貳王統百官均四海而諸官所掌不越居處  
服御財賦絲枲之事此聖人之議道自己者也蓋飲  
食男女人之大欲存焉自公卿以下至於庶人或有  
所制而不敢縱或有所求而未必逞若尊為天子富  
有四海何求而不應何憚而不為哉以是大欲而勢  
足以恢其邪心於以治天下國家焉不知其可也周  
公知百官之得其統四海之得其均其要在王身是  
故先以宮室安其身焉次以飲食理其體焉繼以賦

式節其用焉終以內宮佐其德焉析其事則至纖至  
悉若無關於政治之要而觀其用意本末兼修內外  
交飭以正君身其至醇至備者乎一之以大宰之權  
分之以小宰內宰之任一起居一飲食一貨用一擇  
採進御多寡豐約用舍去取大臣皆得與聞之而天  
子不得以自私女子小人不得以蠱惑而司是職者  
必名德之選是以上智之君安焉而益聖中材之主  
守焉而寡過蓋正心誠意之實功而治天下國家之

本統也

欽定周官義疏卷七